

雲仙雜記序



唐金城馮



編



纂類之望夕岳其間所載世人用于文字者亦不下
數十輩則合未免出陳言也予事科舉三十年蔑然
無効天祐元年退歸七里築選室以居取九岳所
蓄典籍經二十萬八千一百二十卷六十九

百餘帙撮其膏髓別為一望其門目未暇派別也成
于四年之秋由急於應文房之用乃不能詳又數歲
復得終篇者四部英華筆頭飛文壇戈戟應題錄皆

傳記集異之說若見於常常之書者此必畧之庶兵
火煨燼之後哉者不至束手豈小補歟同志者幸爲
珍秘之天復元年十二月序

雲仙禠記目錄

卷之一

幽人筆

飛雲履

孫登琴

碁聲與律呂相應

紅白二墨

龍耳李

碯黃梳

夢裁錦

無塵子

惜春御史

黑松使者

柳神九烈君

六鼻鏡生雲煙

文星典吏

玄山印記

冰玉數珠

為梨花洗粧

籠桶衫柿油巾

石斧銘

棠木印

鳳窠群女

地仙圓

涼物

梅粧閣

洛陽歲節

旃檀寺春秋二會

搔首問青天

清高門戶

午橋莊

養硯墨筆紙

迷香洞

袖裏春

金鳳凰

三賢松

芋魁遭遇

山神以豐年相報

綰龍臺

吳興米

掃露明軒

吞雲夢澤

卷之二

田水聲過吾師

龍鬚友

隱士衫

裕耳鍼砭詩膈鼓吹

半月履

菱角巾

大鯉五色

煙姿玉骨

日精

火筋如兩儀

羔羊揮淚

屋龍更衣

掌有卧蛇文

栗木爲闕

九華半臂

遷官面長額有光氣

壺中景

辯琴秦楚聲

臨光宴

水松牌

泛春渠

百花獅子

桃花紙

酒器九品

暖香滿室如春

啼猿生巖

買春錢

苦吟

蛻龍牙

碎金面碁盤

琴價與武庫爭先

圍碁奪造化

墨紋如履皮

換茶醒酒

腸胃文章映日

天降煤與綾文刺孰勝

粥飼鳩

花簪壓損帽簷

翡翠指環

赤將軍

地貽

胡麻啖犬

得意田

卷之三

過門錢

虞永興書

一醉六日

起宅刷以淳酒

題梁字

卯公厨

厠上以木湯盥手

書北山移文

爭春館

薛家士風

食蒲桃

梅聘海棠根臣櫻桃

檜生藥圓

過廳羊

軟漆纏桑枝為籬

嚼鷄舌香

能詩

朱書禹字渡江河

盡數天星知棊勢

雌雄樹

作詩如繡花

化玉膏

貯蘭蕙

百齒梳

科斗筋魚尾匙

唾地成文

菖蒲當拜此君

界尺筆槽

犀如意

萱草浣衣

虎尾紅管筆

一詩輒洗其筆

句中喜得魚竹

洪兒紙

東修羊

惠一絲兩絲

歲成金釵

鷄鴨卵殼

八梭綾

染花奩

文享媚香無忝

少延清歡

筆文章貨

降龍道者

何徵君隱吳郡

西昌逸士

享糜肉

獵蠅記室

種蔬助鼎俎

蓄鴨

卷之四

石鼈銜賦題

自負書劍

松精成使者

龍窠石

召客念無魚

金鷄抱卵時

胡松節支琴

竊嚙碁子

墨染紙不昏

茶樵縛奴投火

袖餅班中

石蓮匣

鵝丞

粉指印青編

一里更二馬

旋風筆

贈相得以鳩

物價至微

夜飛蟬

羲之鬼

竹枝曲

却老先生

小兒司命

青蠅拜賀

葬得石牌

貧而圖婚

以海駝皮為鼓

上元影燈

軟棗饅

竊花

酒窟

詩成裁窻紙

白羊粧點芳草

浮萍為鴨作首禱

自為小君裁剪

貴家碁子

弄葫蘆成詩

好讀離騷

揆花浸酒

挑野蔬

簇酒

祭詩以酒脯

礮磨齋

斂衣

凌虛宴

桃花醋

蟻肝龍首

卷之五

筆描窻竹影

糖蜜逆交

印宮人臂

念金輪呪

水晶環渡舟

鳴牙餅

棠棣之好

金蘭簿

鴨卵成花

燭圍

宴客典斟

金牌盈座

聚香團

待闕鴛鴦社

笑春紅

二花

三鹿群公

崑崙玉盞

坐間牡丹花

杜鵑喚歸

遇河神

口吻生花

贈詩勝爛黃魚

折筯不休

防風粥

食鱧蟬

羣公對壘

屋尾皆鏤

三年不見羊角

採星盆

作剪刀

左撚巾拭面

碑石

漬紙

除夜歎老

印普賢象

三辰酒

桑木根可作沉香想

皂蓋與日爭功

雷門四老石

握麥莖刀字

麒麟草

魚藻洞

鼻出黃膠

數米而食

廬墓日影爲之不移

飼牛以天麻飯

高麗絲結

食牛肺犯天樞使

菖蒲成獅子鸞鳳狀

鴨肝猪肚

吞花臥酒

庭椿不染風

屋竅如七星

斗麪爲糊供緘封

麪如棗核而中空

卷之六

讀書數真珠以記

竹粉湯

蜀中厚朴

碎錦坊

百年歌

夢青龍吐棊經

白眼蜂

安石榴

嗜鴨嗜

壬癸席

歛妓釵鈿以意記

沈秘景符

沙上玩味成詩

吟詩落齒

綠牝鞍

鳳眼窻

巨栗殼爲盃

眉分九聚

洞天餅

賜成象殿茶果

夏雪價等金壁

蛙臺

棄官求道

携琴就松風澗響

出遊圍碁短具

墨難減者萬金不換

妝茶三等

笏囊笏架

徐峰善碁

瞬碧侯

錢龍宴

王武子好馬

鸞手校尉

剪刀麈月兒羨

玄祿

大雅之文

二儀餅

槐膠彈仔

酒神

九芒珠

石綠鏡臺

自課庵

淵明拜火

筆封九錫

墨封九錫

紙封九錫

硯封九錫

爲花樹洗瘡止痛

卷之七

元白兩不相下

仙人栢葉書

家庖百品

硯中出白影珠

陳蕃待客

桂人好食蝦蟆

霜露能染紅紫

蒲桃髻

方囊盛金錢

千眼仙人赴東林寺

洛如花

蟲念阿房宮賦

甲乙膏

魚脊出金釵

團沙捏成睡嵇康

樂音泉

石斧斫斫斷詩手

清水卽君

徐鳳儀杖

劔生神芝天下宴清

聚芳圖百苓帶

李花如飛仙

起藁窻上

蜜浸烏梅解宿醒

榕粉

灰山

嗜蛤蜊

諱衣

三樣錢買二色酒

大筍中有眼睛

雨熨螺磨紙

沈休文多病

盲郭璞

淨眼僧

竹節中神水

釀換骨膠

畏薯藥

分香蓮

雪艸搔頭

遇碁仙

焚杜詩飲以亭蜜

藏盤筵於水底

七井生涼

卷之八

八角玉升

失去周字知唐必興

曲江春游

毛詩卷染袖代燭

眉睫間常化佛

好李蒼致富

一物如人眼睛

造笙

喬敷嗜魚

浮陽筍

爪甲間皆出雲煙

石魚

王田惜李向蟠桃

重黎盞酌水

時元亨鍊真

孫逢年酒色老不衰

王維居不容塵

磁石益眼

魚喜鹿胎香

降魔寺僧以名召魚

并代人喜嗜麪

鶴識字

洗心糖

桃花絲

秘密泉

怯夜幡

魚鼈隨世安危

書冊以巾漆為糊

真脫絲布

酒中沐浴毛髮識味

龍口渠

口中現五色牙齒

李有九標

斗盆燒乳頭香

鼠精李

猪肝中有識書

酒魔

糠市

品物互徵古事

卷之九

一杯羨三萬錢

縑繫南山樹

心織筆耕

燕奴

三斗爛腸

金菜玉蔬

無腸公子

駭鷄犀

天鼓

虎狼稱呼

鵲巢懶穴

靈運鬚

沒了期

拔釘錢

釜中龍

黃紙寫勅

食玉炊桂

鷓蚌

鰲婦

螳螂搏輪

銅鶴樽

鵲尾杓

麒麟植

喙長三尺手重五斤

鶴鳴雞樹

鳩集鳳池

金剛舞夜叉歌

金祀玉階

傳座

寶苗

築糠三尺

翻綽入水

龍巢翻

見李思戒

一步一計

通神錢

九花虬

上清珠

副急湲

五苓館

烏龍

鬚髯如戟

田舍翁十斛麥

赤鳳凰

卷之十

蕤賓鐵

截韃留鞭

蜂蝶慕香

自暖杯

遊仙枕

辟寒犀

喚鐵

冰山

卷烟

風流藪澤

筆頭生花

百寶欄

吸花露

含玉嚙津

夜明枕

祭花

二鵲擲卵

山雞自愛

天心月脇

茗戰

金鹿銀麕

溫柔鄉

六甲行厨

龍床

九色鳳雛

懷夢草

青鸛

寶井

瓊厨金穴


流香渠

書倉

如願

金壘玉膾

閃電窓



目錄終

雲仙雜記卷之一



唐金城馮



幽人筆

司空圖隱於中條山芟松枝為筆管人問之曰幽人

筆正當如是 汗漫錄

飛雲履

白樂天燒丹于廬山草堂作飛雲履玄綾為質四面
以素絹作雲朵雜以四選香振履則如煙霧樂天着
示山中道友曰吾足下生雲計不久上升朱府矣

樵

人直說

孫登琴

孫登琴遇雨必有響如刃物聲竟因陰雨破作數截

有黑蛟踴去

金徽變化篇

棊聲與律呂相應

元頤本枰棊聲與律呂相應蓋用響玉為盤非有異

術也

棊天洞覽

紅白二墨

楚王靈夔使人造紅白二墨為戲及書寫衣服黑衣

用白書白衣用紅書自成一家 大唐龍髓記

龍耳李

崔奉國家一種李肉厚而無核識者曰天罰乖龍必

割其耳耳血墮地故生此李

琴莊美事

溜黃椀

元載飲食冷物用溜黃椀熱物用泛水瓷器 匕有匕

三千事

出樞要錄

夢裁錦

蕭穎士少夢有人授紙百番開之皆是繡花又夢裁

錦因此文思大進出文筆襟喉

無塵子

方鎔隱天門山以椶櫚葉拂書號曰無塵子月以酒脯祭之出高士春秋

惜春御史

穆宗每宮中卷開則以重頂帳蒙蔽欄檻置惜春御史掌之號曰括香王塵集

黑松使者

元宗御案墨曰龍香劑一日見墨上有小道士如蠅

而行上叱之即呼萬歲曰臣即墨之精黑松使者也
凡世人有文者其墨上皆有龍賓十二上神之乃以墨分賜掌文官出陶家餅餘事

柳神九烈君

李固言未第前行古柳下聞有彈指聲固言問之應曰吾柳神九烈君已用柳汁染子衣矣科第無疑果得藍袍當以棗餠祠我固言許之未幾狀元及第出

三峯集

六鼻鏡生雲煙

黃巢陷京城南唐王氏有鏡六鼻常生雲煙照之則左右前三方事皆見王氏向京城颺之巢寇兵甲如在目前上平都邑以映日紗囊取入禁中

出纂異記

文星典吏

杜子美十餘歲夢人令采文于康水覺而問人此水在二十里外乃往求之見鶩冠童子告曰汝本文星典吏天使汝下謫爲唐世文章海九雲誥已降可於豆壠下取甫依其言果得一石金字曰詩王本陳芳國九夜捫之麟篆熟聲振扶桑享後天福因佩入葱市歸而飛火滿室有聲曰解后穢吾令汝文而不貴出文覽

玄山印記

陳茂爲尚書郎每書印記曰玄山典記又曰玄山印擣朱礬澆麝酒閉則匣以鎮犀養以透雲香印書達數千里香不斷印刻烟脂木爲之出玄山記

水玉數珠

房次律弟子金圖十二歲時次律徵問葛洪仙錄中事以水玉

一云玄珠

數珠手節之凡兩徧近二百事

琅琅誦之不止次律賞以轉枝梨童子通神集

為梨花洗粧

洛陽梨花時人多携酒其下曰為梨花洗粧或至買樹唐餘錄

籠桶衫柿油巾

杜甫在蜀日以七金買黃兒米半藍細子魚一串籠桶衫柿油巾皆蜀人奉養之粗者出浣花旅地志

石斧銘

玄針子得石斧銘天雷斧連文步敲石柱子如其言

詩如蒸雲千步千首清異志

棠木印

張寶凡衣服綵帛皆以所任官印之曰黃物以墨紅黑物以粉常曰此印贖於掌庫奴遠矣文字亦然人收寶文以有棠木印者為真張寶苑印錄

鳳窠群女

姑臧太守張憲使倡戴拂壺巾錦仙裳蜜粉淡粧使侍閣下奏書者號傳芳妓酌酒者號龍津女傳食者號僊盤使代書札者號墨娥換香者號麝姬掌詩棠

者號雙清子諸倡曰鳳窠羣女又曰團雲隊曳雲仙
出姑臧前後記

地仙圓

號州別駕竇淝以當歸為仙圓曰使血海增光以棗
木為杵白號金剛骨 出三堂往事

涼物

房壽六月召客坐糠竹簟凭狐文几編香藤為俎劑
椰子為盃搗蓮花製碧芳酒調羊酪造含風鮓皆涼
物也壽勸吳田以轆轤瓮田懼其深曰但思龍門溪

水濯麴蘖腸耳 出叩頭錄

梅粧閣

郭元振落梅粧閣有婢數十人客至則拖鴛鴦櫛羣
參一曲終則賞以糖鷄卵明其聲也宴罷散九輪握
香 出叙聞錄

洛陽歲節

洛陽人家正旦造絲鷄葛燕粉荔支正月十五日造
火娥兒食玉梁餈寒食裝萬花輿煮楊花粥端午木
羹艾酒以花絲樓閣挿鬢贈遺辟瘟扇乞巧使蜘蛛

結萬字造明星酒裝同心膾重九迎涼脯羊肝餅佩
瘦木符冬至煎錫絲珠戴一巾除夜銅刀刻門埋小
兒硯點水盆燈臘日造脂花燄

金門歲節

旃檀寺春秋二會

旃檀寺悟本師春秋二會歛牛乳為龍華飯供獻結
絲錢為幡蓋設客以吳興鬻團糟授戒者施以般若
錢求男者解密珠璫

出僧園逸錄

搔首問青天

李白登華山落鴈峰曰此山最高呼吸之氣想通天

帝座矣恨不携謝眺驚人詩來搔首問青天耳

搔首集

清高門戶

樂天語人曰吾已脫去利名枷鎖開清高門戶但連

龕子母丹不知何時可成

自慶傳

午橋莊

裴令臨終告門人曰吾死無所繫午橋莊松雲嶺未
成軟碧池繡尾魚未長漢書未終篇為可恨爾

晉公

遺語

養硯墨筆紙

養筆以硃黃酒舒其毫養紙以芙蓉粉借其色養硯以文綾蓋貴乎隔塵養墨以豹皮囊貴乎遠濕逢溪子遵之文房寶飾

迷香洞

史鳳宣城妓也待客以等差甚異者有迷香洞神鷄枕鎖蓮燈次則交紅被傳香枕八分羊卞列不相見以閉門羹待之使人致語曰請公夢中來馮垂客于鳳釐囊有銅錢三十萬盡納得至迷香洞題九迷詩于照春屏而歸常新錄

袖裡春

元宗為太子時愛妾號鸞兒多從中貴董逍遙微行以輕羅造梨苓散藥衰以月麟香號袖裏春所至暗遺之史諱錄

金鳳凰

周光祿諸妓掠髮用鬱金油傅面用龍消粉染衣以沈香水月終人費金鳳凰一隻傳芳畧記

三賢松

朝真觀九星院有三賢松三株如古君子梁閣老妓

英奴以麗水囊貯香遊之不數日松皆半枯事畧

芋魁遭遇

李華燒三城絕品炭以龍腦裹芋魁煨之擊爐曰芋

魁遭遇矣三賢典語

山神以豐年相報

琴叟耕鳳嶺之田以虎紋巾裹犁推之曰勞吾躬耕

山神必以豐年相報已而果然鳳翔退耕

綰龍臺

李神遇以楓溪鐵造綰龍臺為宴燈花燈八層間以

三縫錦標點紫菱油燃鳳縷疑尚缺文出招撫精華

吳興米

吳興米炊之甌香白馬豆食之齒號國夫人厨吏鄧

連以此米擣為透花餠以豆洗皮作灵沙臙以供翠

鴛堂品物類聚記

掃露明軒

王施避巢寇入天台主人賀理給以牛粥練羣施謝

曰公乃命司延我光景當為掃露明軒永為下吏芳

吞雲夢澤

張曲江語人曰學者常想曾次吞雲夢澤筆頭湧若
耶溪量既包文亦浩瀚

徵文玉井

雲仙雜記卷之一

雲仙雜記卷之二

田水聲過吾師文人

淵明嘗聞田水聲倚杖久聽歎曰秫稻已秀翠色染
人時剖芻襟一洗荆棘此水過吾師丈人矣

淵明別傳

龍鬚友

郗詵射策第一再拜其筆曰龍鬚友使我至此後有
貴人遺金龜并拔藥石簪咸與弟子曰可市筆三百
管退而藏之貯以文錦一千年後猶當令子孫以名
香禮之

龍鬚志

隱士衫

成芳隱麥林山剝苧織布爲短襪寬袖之衣着以酤酒自稱隱士衫

梁福廬陵記

俗耳鍼砭詩腸鼓吹

戴顓春携双柑斗酒人問何之曰往聽黃鸝聲此俗耳鍼砭詩腸鼓吹汝知之乎

高隱外書

半月履

趙廷芝安成人作半月履裁千紋布爲之托以精銀縑以絳蠟唐輔明過之奪取以貯酒已乃自飲廷芝

問之答曰公器皿太微此履有滄海之積矣

妙豐居

士安成記

菱角巾

王鄰隱西山頂菱角巾又嘗就人買菱脫頂巾貯之常求遇而歎曰此巾名實相副矣

董慎續豫章記

大鯉五色

孫願夜行橫塘見池中大魚映月吸水移時不去池外數步有一小坎正涵北斗有蝦蟇數十共來飲吸願異之明日汰池中惟有一大鯉身已五色復來坎

所訪求蝦蟇得三足者數十馮王雲金溪記

煙姿玉骨

袁豐居宅後有六株梅開時爲鄰屋煙氣所爍屋乃貧人所寄豐即圖泥塞竈張幕風久之拆去其屋歎曰煙姿玉骨世外佳人但恨無傾城笑耳即教妓秋蟾出比之乃云可與比驅爭先然脂粉之徒正當在後張洞林桂林志

日精

陸展郎中見楊梅歎曰此果恐是日精然若無蜂兒

採香誰勝難和之味即以竹絲籃貯千枚并茶花蜜

送衡山道士

常奉真湘潭記

火筋如兩儀

朱符謂火筋如兩儀成變化不可缺一本明大師在坐曰當以玉爲之貴能不熱李明之衡山記

羔羊揮淚

程皓以鐵床脅肉肥膏見火則油焰淋漓皓戲言曰羔羊揮淚矣又云我以三十萬錢償鐵匠而得此奉養豈不太過方德遠金陵記

屋龍更衣

饒子卿隱廬山康王谷無尾屋代以茅茨每年一易茅謂之屋龍更衣或時雨濕致漏則以油幄承梁坐於其下初不愁歎十三賢共注廬山記

掌有臥蛇文

傳咸掌有蛇文指甲上隱起花草如雕刻是以文章過人逍遙公南康記

栗木為關

凡門以栗木為關者夜可以遠盜從容錄

九華半臂

關文衍為散騎常侍思九華山圖於白綾半臂號九華半臂自云令吾此身常在雲泉之內時逢青陽記

遷官面長額有光氣

郭汾陽每遷官則面長二寸額有光氣事已乃復隴王書

壺中景

石崇砌上就苔蘚刻成百蒼飾以金玉曰壺中之景不過如是耕桑偶記

辯琴秦楚聲

李龜年至歧王宅聞琴聲曰此秦聲良久又曰此楚聲主人入問之則前彈者隴西沈妍也後彈者揚州薛滿二妓大服乃贈之破紅綃蟾酥麩龜年自負強取妍秦音琵琶捍撥而去

辯音集

臨光宴

正月十五夜元宗於常春殿張臨光宴白鷺轉蒼黃龍吐水金鳧銀燕浮光洞攢星閣皆燈也奏月分光曲又撒閩江錦荔支千萬顆令宮人爭拾多者賞以

紅圈帔綠暈衫

影燈記

水松牌

李白遊慈恩寺寺僧用水松牌刷以吳膠粉捧乞新詩白爲題訖僧獻玄沙鉢綠英梅檀香筆格蘭縑袴

紫瓊霜

海墨微言

泛春渠

汝陽王璉雲夢石甃泛春渠以蓄酒作金銀龜魚浮沉其中爲酌酒具自稱釀王兼翹部尚書

醉仙圖記

百花獅子

曲江貴家遊賞則剪百花裝成獅子相送遺獅子有
小連環欲送則以蜀錦流酥牽之唱春光且莫去留
與醉人看曲江春宴錄

桃蒼紙

楊炎在中書後閤糊窗用桃花紙塗以冰油取其明
甚鳳池編

酒器九品

李適之有酒器九品蓬萊盞海川螺舞仙盞瓠子卮
幔捲荷金蕉葉玉蟾兒醉劉伶東溟樣蓬萊盞上有

山象三島注酒以山沒為恨舞仙盞有關挾酒滿則
仙人出舞瑞香毬子落盞外逢原記

暖香滿室如春

寶雲溪有僧舍盛冬若客至不燃薪火暖香一炷蒲
室如春人歸更取餘燼雲林異景志

啼猿生巖

猿啼之地巖乃多有每啼一聲遽生萬莖窮幽記

買春錢

進士不第者親知供酒肉費號買春錢承平舊纂

苦吟

孟浩然眉毫一作毛盡落裴祐袖手衣袖至穿王維
至走入醋甕皆苦吟者也詩原指訣

蛻龍牙

取蛻龍牙一枚手握之臨局自然機變橫出手參碁訣

碎金面碁盤

蘇尚書八十猶參禪大瀉訪之以手拍碎金面碁盤
尚書尋有悟解舊相禪學錄

琴價與武庫爭先

嵇康抱琴訪山濤濤醉欵剖琴曰吾賣東陽舊業以
得琴乞尚書令河輪珮玉截爲徽貨所衣玉簾中單
買縮絲爲囊論其價與武庫爭先汝欵剖之吾從死
矣金徽變化篇

圍碁奪造化

王勃圍碁率下四子成一首詩勃猶詫之向人曰吾
材奪造化雖一時之間百用亦可碁天洞覽

墨紋如履皮

墨紋如履皮磨之有油暈者一兩可染三萬筆成老
相墨經

換茶醒酒

樂天方入關齊禹錫正病酒禹錫乃餽菊苗壅蘆菹
鮓換取樂天六班茶二囊以醒酒蠻甌志

腸胃文章映日

元稹爲翰林承旨朝退行鐘廊時初日映九英梅隙
光射稹有氣勃勃然百僚望之曰豈腸胃文章映日
可見乎常朝錄

天峰煤與綾文刺孰勝

盧杞與馮盛相遇於道各携一囊杞發盛囊有墨一
枚杞大笑盛正色曰天峰煤和針魚腦入金溪子手
中錄離騷古本比公日提綾文刺三百爲名利奴顧
當孰勝已而搜杞囊果是三百刺大唐龍髓記

粥飼鳩

蘭先生坐琴莊食蘭香粥有鳩至堦上先生以匙擲
飼之漸進至肩遂盡此粥後日鳩以千百至先生皆
飼之琴莊美事

花簪壓損帽簷

梁緒梨巷時折花簪之壓損帽簷至頭不能舉祥雲志

翡翠指環

何克妓於後閣以翡翠指環換曰此物洞仙與吾欲保長年以蜻蜓帽贖之粧樓記

赤將軍

哥舒翰有馬曰赤將軍翰愛之甚常以朝章加其背曰北林兒遠矣此駿材也馬癖記

地脂

高展爲并門判官一日見砌間沫出以手撮之試塗一老叟面上皺皮頓改如少年色展以謂必神藥問承天道士荅曰此名地脂食之不死展乃發甕已無所覩方鎮編年

胡麻啖犬

以胡麻麩啖犬則光黑而駿使獵必大獲狐兔又可得三十歲好事集

得意田

雲陽段氏值豐年則盡取金錢埋之九里皆滿日有得意田遂可棄無用金 豐年錄

雲仙雜記卷之二

雲仙雜記卷之三

過門錢

龍山康甫慷慨不羈每日置酒於門邀留賓客不住者贈過門錢日費酒者鶴觜餅二十 放懷集

虞永興書

有人收得虞永興與圓機書一紙剪開字字賣之礬鄉一字得麻一斗鶴口一字得銅硯一枚房村一字得羊千頭隨人好之淺深 字錦

一日六醉

張麟一醉六日嚙柱幾半 醉錄

起宅刷以醇酒

蓮花巷王珊起宅畢其門刷以淳酒更散香末蓋禮神之至 宣武盛事

題梁字

范溥題聽事梁每字以木花蓮承之歲旦一開次日復上之 河中記

卯公厨

韋陟厨中飲食之香錯雜人入其中多飽飲而歸語曰人欲不飯筋骨舒實緣須入卯公厨 長安后記

厠上以朮湯盥手

陳宛盛其居止厠上以朮湯盥手槐枝覆蔽糞穴爲都城第一 洛陽要記

書北山移文

樂天女金鑿十歲忽書北山移文示家人樂天方買終南紫石欲開文士傳遂輟以勒之 豐寧傳

爭春館

揚州太守圃中有杏花數十輟每至爛開張大宴一

株令人倡倚其傍立館曰爭春開元中宴罷夜衣闌
人或云花有歎聲揚州事迹

薛家士風

成都薛氏家士風甚美厨司以半瓠為杓子孫就食
蝦羹肉臠一取之飯再取之蜀晉錄

食蒲桃

楊炎食蒲桃曰汝若不遊當以太原尹相授河東備錄

梅聘海棠棖子臣櫻桃

黎舉常云欲令梅聘海棠棖子臣櫻桃及以芥嫁笋

但恨時不同耳然牡丹醪釀揚梅枇杷幸為執友金

城記

檜生藥園

幽燕思仙驛後有五樹檜忽生藥園試摘服之往往
療疾有驗幽燕記異

過廳羊

熊翻每會客至酒半堦前旋殺羊令衆客自割隨所
好者綵線繫之記號畢烝之各自認取以剛竹刀切
食一時盛行號過廳羊青州雜記

軟漆纏桑枝為籬障

杜勝宅以軟漆纏桑枝編為籬障兩一過黑光照四
面時通甫愛之欲以銅官第換取不應鄴郡名錄

嚼鷄舌香

飲酒者嚼鷄舌香則量廣浸半天回則不醉酒中玄

能詩

能詩之士兩泡滅則得意香煙斷而成吟白氏金鎖

朱書禹字渡江河

渡江河者朱書禹字佩之免風濤保安吉禹功記

盡數天星徧知棊勢

人能盡數天星則徧知棊勢止戈集

雌雄樹

九仙殿銀井有梨二株枝葉交結宮中呼為雌雄樹

金鑿蜜記

作詩如繡花

作詩如繡花女籠絡枝葉而已無過不及乃善鍾嶸
句眼

化玉膏

金臺錄
衛斧盥面用化玉膏及芹泥故色愈明潤終不枯槁

貯蘭蕙

王維以黃磁斗貯蘭蕙養以綺石累年彌盛汗漫錄
百齒梳

孫思邈以交加木造百齒梳用之養生要法也樵人直說

科斗筋魚尾匙

向範待客有漆花盤科斗筋魚尾匙樞要錄

唾地成文

有人謁李賀見其久而不言唾地者三俄而成文三篇文筆襟喉

菖蒲當拜此君

王徽之以菖蒲映竹曰菖蒲止以九節為貴而此君
面日聳然正面再拜此君而此君亦安得不受之耶
高士春秋

界尺筆槽

有借界尺筆槽而破其槽者白其主人曰韞直木如

常孤竹君無恙但半面之交忽然折節矣主人大笑
玉麈集

犀如意

虞世南以犀意爬癢久之歎曰妨吾聲律半工夫
餘事

萱草浣衣

鄭源令婢萱草浣衣萱草輒云郎君塵土太多令人
手皮俱脫 三峯集

虎毛紅管筆

有儼馬生甚貧遇人與虎毛紅管筆一枝所須但呵筆
即得之然夫妻之外令一人知則殆矣時方盛行疑
煙帳風篁扇皆呵而得之一日晚思兔頭羨連呵遂
得數盤夫妻不能盡以與鄰家自是筆雖存呵之無
應 纂異記

一詩輒洗其筆

白傳每一詩輒洗其筆

文覽

句中喜得魚竹

孟浩然一日周旋竹間喜色可掬又見網師得魚尤

甚喜躍友人問之荅云吾適得句中有魚竹二物不知竹有幾節魚有幾鱗疑致踈繆今見二物乃釋然矣
玄山記

洪兒紙

姜澄十歲時父苦無紙澄乃燒糠協竹爲之以供父澄小字洪兒鄉人號洪兒紙
童子通神錄

束修羊

倪若水藏書甚多列架不足疊窻安置不見天日子弟直日看書借書先投束修羊
唐餘錄

惠一絲兩絲

杜甫寓蜀每蠶熟即與兒躬行而乞曰如或相憫惠我一絲兩絲
沅花族地志

蕨成金釵

王鯨逢賣蕨姥黃衣破結有飢色憫之乃以千錢買蕨姥謝而去及歸烝干烏頭甑盡成金釵蓋姥非常人也
清異志

鷄鴨卵殼

張寶嘗使子弟巡市乞鷄鴨卵殼雞卵以煮藥鴨卵

以金絲縷海棠花名鮫胎盞醉後畏酒時多用之就
印錄

八梭綾

鄴中老母村人織綾必三交五結號八梭綾匹直米

陸筐

摺拾精華

染花奩

郭代公愛姬薛氏貯食物以散風奩收粧具以染花

奩

品物類聚記

文享媚香無忝

張說携麗正文章謁文生時正行宮中媚香號化樓

臺友生焚以待說說出文置香上曰吾文享是香無

無忝

徵文玉井

少延清歡

陶淵明得太守送酒多以春秫水雜投之曰少延清

歡數日

淵明別傳

筆文章貨

羅隱喜筆工長鳳語之曰筆文章貨也吾以一物助
子取高價卽贈鴈頭牋百幅士夫聞之懷金問價或

以綵羅大組換之 龍髭志

降龍道者

戴顓見降龍道者曰生死外人願陳三拜獻護經簾
青銅磬 芳賢傳

何徵君隱吳郡

何徵君隱吳郡多遊臨華寺九金堂飲鹿塘靈寶院
涵星澗 高隱外書

西昌逸士

卽詠隱西昌採樵爲業或擔至郡中人買之則曰我西

昌逸士酒中人也今獻公當惠我所好廬陵記

享鹿肉

黃昇日享鹿肉二斤自晨煮至日影下門西則喜曰
火候足矣如是四十年 安成記

獵蠅記室

盧記室多作脯腊夏則委人於十步內扇上塗飴以
撲蠅脯以青紗障隔塵士時人呼為獵蠅記室 金溪

記

種蔬助鼎俎

宋宇種蔬三十品時雨之後按行園圃曰天茁此徒
助予鼎俎家復何患

豫章記

蓄鴨

富楊庭蓄鴨萬隻每飼以米五石遺毛覆渚

桂林記

雲仙雜記卷之三

雲仙雜記卷之四

石鼈銜賦題

高郢夜課于豐亭忽見一鼈在案上視之石也郢異
其事取千題散置楮中禱祝令石鼈銜之以卜來事
既而石鼈舉頭乃是沙洲獨鳥賦題出果然其年首
選

湘潭記

自負書劔

凌倚隱衡山往來自負書劔削竹爲擔累以烏氈倚
旣死山僧取以供事

衡山記

松精成使者

茅山有野人見一使者異服牽一白羊野人問居何地曰偃蓋山隨至古松下而沒松形果如偃蓋意使者乃松樹精羊乃茯苓耳

金陵記

龍窠石

中山僧表堅面多癡痕偶溪中得石如鷄子夜覺涼冷信手磨面癡痕盡滅後讀博異志曰龍窠石瘡癢

大效 廬山記

召客念無魚

蘇贖郎中召客無魚念曲江多有而禁釣乃令掌吏

用油幕偷裹數頭適濟其事 承平舊纂

金鷄抱卵時

封少卿問禪於龍華厚參師曰金鷄抱卵時如何少卿歸而默坐三年不能領解至于發狂而死

禪學錄

胡松節支琴

白傅用胡松節支琴 金衛變化篇

竊燕碁子

李杓直與人碁而敗乃竊數子噉之及乎尋問乃鼓

局大怒 慕天洞覽

墨染紙不昏

墨染紙三年字不昏暗者爲上 成老相墨經

茶焦縛奴投火

陸鴻漸採越江茶使小奴子看焙奴失眠茶焦爍鴻
漸怒以鐵繩縛奴投火中 蠻甌志

袖餅班中

于琮班中有時袖餅而食或以遺同列 常朝記

石蓮匣

許芝有妙墨八厨巢賊亂瘞于善和里第事平取之
墨已不見惟石蓮匣存焉 大唐龍髓記

鵝丞

藺先生上隱亭望九里山七日不能下但食鵝丞二
十段 琴莊美事

粉指印青編

徐州張尚書妓女多涉獵人有借其書者往往粉指
痕並印于青編 雜樓記十

一里更二馬

校書郎李蟠蓄馬甚多出遊則一里更二馬借借供
應可逮十家馬癖記

旋風筆

魏博田承嗣簽治文案如流水吏人私相謂曰世罕
有此旋風筆方鎮編年

贈相得以鳩

毛傅好食鳩人與已相得者必以鳩贈之一見李翱
贈二十籃好事集

物價至微

開成中物價至微村落買魚肉者俗人買以胡絹半
尺士大夫買以樂天詩一首兼與之豐年編

夜飛蟬

杜甫每朋友至引見妻子章侍御見而退使其婦送
夜飛蟬以助粧飾放懷集

羲之鬼

虞世南書冠當時人謂其有羲之鬼字錦

竹枝曲

張旭醉後唱竹枝曲反復必至九回乃止醉錄

却老先生

王僧虔晚年惡白髮一日對客左右進銅鑷僧虔曰
却老先生至矣庶幾乎南康記

小兒司命

郭汾陽語子弟曰西陽庶寶方小兒之司命不可不
讀從容錄

青蠅拜賀

術士相牛僧孺若青蠅拜賀方能及第公疑之及第
登科訖歸坐家庭有青蠅作八行立約數萬折躬再三

良久乃去青陽記

葬得石碑

烏重胤葬先世掘得石碑有云牛領岡前紅簫隴下
墓用丙日手板相亞重胤依而用之壠上書

貧而圖婚

白厚貧而圖婚娶劉純材女厚送烏璫十事焚紙爲
書純材大笑荅以象田珠十升紫弱千餘頭及使家
僮撒燭花盈路厚閉門大慙賓客走去耕桑偶記

以海駝皮爲鼓

凡鼓以海駝疑是鮫字皮爲之泥以象骨則雄而清用雜皮則濁而易散云 辨音集

上元影燈

洛陽人家上元以影燈多者爲上其相勝之辭曰千影萬影又各家造羊卽君食之宜男女仍云送鷄肉酒用六木餅貯之於親知門前留地而去 影燈記

軟棗糕

宣慈寺每求化人先留食軟棗糕柳尚書來方食糕袖䟽欵出尚書急解連帶緋袍鐮子魚袋施之 海墨

微言

竊巷

霍定與友生遊曲江以千金募人竊貴侯亭榭中蘭花挿帽兼自持往綺羅叢中賣之士女爭買拋擲金錢又各以錐刺藕孔中者罰巨觥不中者得美饌 曲江春宴錄

酒窟

蘇晉作曲室爲飲所名酒窟又地上每一磚鋪一甌酒計甌約五萬枚晉日率友朋次第飲之取盡而已

醉仙圖記

詩成裁窻紙

段九章詩成無紙就窻裁故紙連綴用之九章字惠文逢原記

白羊糝點芳草

午橋莊小兒坡茂草盈里晉公每使數羣白羊散于坡上曰芳草多情賴此糝點也窮幽記

浮萍爲鴨作茵褥

浮光多美鴨太原少尹樊千里買百隻置後池載數

車浮萍入池使爲鴨作茵褥

雲林異景志

自爲小君裁剪

李紳爲相時俗尚輕綃染蘸碧爲婦人衣紳爲小君

裁剪鳳池編

貴家碁子

開成中貴家以紫檀心端龍腦爲碁子碁訣

弄葫蘆成詩

王筠好弄葫蘆每吟詠則注水於葫傾已復注若擲

之於地則詩成矣詩源指訣

好讀離騷

錢芸士好讀離騷手不暇揭忘去肉味半月如齋姑
藏記

接花浸酒

揚恂遇花時就花下取葉粘綴于婦人衣上微用蜜
蠟兼接花浸酒以快一時之意三堂往事

挑野蕮

郭元申家貧無食春月携兒挑野蕮一日有餘三日
不出叩頭錄

簇酒

辛洞好酒而無資常携榼登人門每家取一盞投之
號為酒簇叙間錄

祭詩以酒脯

賈島常以歲除取一年所得詩祭以酒脯曰勞吾精
神以是補之金門歲節

礮磨齋

都下寺院每歲用除礮磨是日作礮磨齋僧園逸記

斂衣

伊處士從衆人求尺寸之帛聚而服之名曰歛衣搔首集

凌虛宴

齊文宣帝凌虛宴取香菌以供品味廣唐則出於石首銅官等處銅釘菌分絲菌自慶傳

挑芥醋

唐世風俗貴重葫蘆醬芥醋照水油晉公遺語

蟣肝龍

毛重教授於導江春日主人宴之賦散語曰蟣肝之

奉何堪龍首之攀可望主人曰吾勸以陸源鯖賞以

柳綿肝文房寶笈

雲仙雜記卷之四

雲仙雜記卷之五



筆描窻竹影



宗測樂閑靜好松竹嘗見日篩竹影上窻以筆備描
之常新錄

糖蜜莫逆交

陳昉得蜀輒以蜜澆之曰與蜜本莫逆交傳芳畧記

風月常新印宮人臂

明皇開元初宮人被進御者日印選以綢繆記印于臂
上文曰風月常新印畢漬以桂紅膏則水洗色不退

念金輪呪

敲兩耳鐺服桂心丸念金輪呪則所思之人不以存
沒是夜必夢見之 事畧

小晶環渡舟

蕭整嘗登陸渾沙洲忽水漲不得下急呼村童拆塵
尾水晶環與之渡舟而過 三賢典語

鳴牙餅

許康年謁劉遜贈遜鳴牙餅千枚曰雖微物也助厨

中兩日之費

退耕傳

棠棣之好

李杓直遇與人相知則曰棠棣之好何以過此喜慶

倍常

叙間錄

金蘭薄

戴弘正每得密友一人則書于編簡焚香告祖考號

為金蘭薄

宣武盛事

鳴卵成卷

向聲能於鐺中以手撥鳴卵成花

河中記

燭圍

常陟家宴使每婢執一燭四面行立人呼為燭圍

長安後記

宴客典斟

陳無咎宴客一客用一婢典斟必十二斟而後使滿以盡誠敬之道

洛都要記

金牌盈座

河間王夜飲妓女謳歌一曲下一金牌席終金牌盈

座

豔豆盈傳

聚香團

揚州太守仲端畏妻不敢延客謝廷皓謁之坐久飢

甚端入內袖聚香團嚼之

揚州事述

待闕鴛鴦社

朱子春未婚先開房室帷帳甚麗以待其事旁人謂

之待闕鴛鴦社

粧樓記

笑春紅

閬州參軍黃涉婢曰笑春紅死涉念之淚洒犀簾至

皆損壞

蜀普錄

二卷

阮文姬挿髮用杏花陶溥公呼曰二花 河東備錄

三鹿郡公

袁利見為性頑獷方棠謂袁生已封三鹿群公蓋譏

其太寵踈也 幽燕記

崑崙玉盞

宇文卓方執崑崙玉盞聽左丞檀超高談不覺墜地

青州雜記

坐間牡丹

宋旻語常帶華藻李孺安曰時方三月坐間生無數

牡丹花矣 鄴郡名錄

杜鵑喚歸

石誼未娶聞杜鵑喚歸歎曰此物催人使歸使我何

所歸邪 金臺錄

遇河神

顧希微開成二年遇河神屈莫多曰更二千年大江

所在堤岸當崩沙九里 禹功記

口吻生花

張祐苦吟妻孥喚之不應以責祐祐曰吾方口吻生
花豈恤汝輩白氏金鑠

贈詩勝爛黃魚

皇甫彙謁韜愈愈贈以詩彙退有言怒愈不爲置酒
愈曰豈不勝以爛黃魚待汝邪續鐘嶸句眼

折筋不休

山濤酒後哺啜折筋不休酒中玄

防風粥

白居易在翰林賜防風粥一甌剔取防風得五合餘

食之口香七日金鑠密記

食螬蚘

鹿宜孫食螬蚘炙於壽陽瓮中頗進數器止戈集

羣公對雪

群公對雪尚隆之曰麩堆金井誰調湯餅吳水素曰
玉滿天山難刻珮環坐間服其韻精姑臧記

屋瓦皆鏤

余宗伯屋瓦皆鏤竅穴千百雨則散如真珠用陳留
瓦則堅而易鏤三堂往事

三年不見羊角

皮蕃去北而復來鄱陽食竹筍曰三年不見羊角哀

矣叩頭錄

採星盆

嵇昌蓄採星盆夏月漬果則倍冷叔間錄

作剪刀

姑園鐵作剪刀以首霜根粉養之裁衣則盡成墨界

不用人手而自行搔首集

左撚巾拭面

陽華用左撚巾拭面有光彩自慶錄

碑石

李輔國葬父碑石用豆屑一千圓磨瑩如紫玉碑字

四面鑿葵花三百朵晉公遺語

漬紙

以竹梢甘露和天南星漬紙一宿裁之刀去如飛文

房寶飾

除夜歎老

裴度除夜歎老迨曉不寐爐中商陸火凡數添也金

門歲節

印普賢象

玄裝以回鋒紙印普賢象施于四衆每歲五馱無餘
僧園逸錄

三辰酒

玄宗置麴精潭砌以銀甃泥以石粉貯三辰酒一萬
車以賜當制學士等 史諱錄

桑木根可作沉香想

裴休得桑木根曰若作沉香想之更無異相雖對沉

水香反作桑根想終不聞香氣諸相從心起也 常新錄

皂蓋能與日輪爭功

韓愈刺潮州嘗暑中出張皂蓋歸而喜曰此物能與
日輪爭功豈細事邪 傳芳畧記

雷門四老石

王維輞川林下坐用雷門四老石燈滅則石中鑽火 畧

握麥芒刀字

牛僧孺進士時常握麥芒刀字有繆誤隨手刪割點
定 三賢典畧

麒麟草

元和昔館閣湯飲待學士者煎麒麟草鳳翔退耕傳

魚藻洞

魚朝恩有洞房四壁夾安瑠璃板中貯江水及萍藻

諸色蝦號魚藻洞南康記

鼻出黃膠

賀知章忽鼻出黃膠數盆醫者謂飲酒之過

數米而食

沈休文羸劣多病日數米而食羹不過一筋青陽記

廬墓日影爲之不移

鄧寅廬墓墳土未乾日影爲之不移壠上記

飼牛以天麻飯

青齊間遇春耕則飼牛以天麻飯仍用錦縷繫于角

上 耕桑偶記

高麗絲結

張均妓多麗彈琵琶曲項上有高麗絲結趙詩爭奪

致傷二指

辯音集

元夜食牛肺犯天樞使

梁鄴上元後忽髮變如血卜曰元夜食牛肺犯天樞
巡使夜行禱謝可免影燈記

菖蒲成獅子鸞鳳狀

僧普寂大好菖蒲房中以菖蒲種成獅子鸞鳳仙人
之狀海墨微言

鴨肝豬肚

王縉飲酒非鴨肝豬肚筋輒不舉醉仙圖

吞花臥酒

虞松方春以謂握月擔風且留後日吞花臥酒不可
過時曲江春宴錄

庭椿不染風

盧携乃夢人贈句曰若問登庸日庭椿不染風初不解
其言後數年携拜相庭下古椿一株雖狂風驟雨不
濕不搖鳳池編

屋竅如七星

鄭廣文屋室破漏自下望之竅如七星逢原記

日用斗麩爲糊以供緘封

順宗時劉禹錫干預大權門吏接書尺日數千禹錫一一報謝綠珠盆中日用麩一斗爲糊以供緘封宣武盛事

麩如棗核而中空

揚埏游王鉷家食一物如棗核而中空其實麩也埏詢其法鉷笑而不言河中記

雲仙雜記卷之五

雲仙雜記卷之六

讀書數真珠以記

于授幼時家以綠真珠勝爲簾押授讀書數真珠以記日輒一遍長安後記

竹粉湯

夏侯鉞謁盧懷慎坐終日得竹粉湯一盞洛都要紀

蜀中厚朴

蜀中厚朴若酒後采之紫色湯散用輒無力窮幽記

碎錦坊

晉公午橋莊有文杏百株其處立碎錦坊曹林異景

百年歌

李觀作百年歌王湜請其法觀向湜彈指曰遺子瓜

甲清塵庶幾文思有加詩源指訣

夢青龍吐棊經

王積薪夢青龍吐棊經九却授已其藝頓精出棊訣

白眼蜂

蠶退之後多為乾腊貨之開元中春末两市多白眼

蜂如山市人以此卜絲帛之豐儉豐寧傳

安石榴

李漢碎胡瑪瑙盤盛送王言曰安石榴莒見之不疑

既食乃覺揚州事迹

嗜鴨腊

彭几嗜鴨腊未曝前三日置鎮石之下時所共服蜀

音錄

壬癸席

申王謂猪既供食不宜處於穢處乃以氈龕粟粥待

之取其毛刷淨令巧工織壬癸席滑而且涼河東備

歛諸妓釵鈿以記意

金城多美妓賀蘭釗曰吾既臨人私情難展遇宴飲則歛奪諸妓釵鈿退以記意

金城記

沈秘景符

禹導河之際沈秘景符以鎮五千之水患後人賴焉

禹功記

沙上玩味成詩

柳宗元吟春水如籃詩久之不成乃取九脚床於池

邊沙上玩味終日僅能成篇

白氏金鎖

吟詩落齒

謝靈運半日吟詩百篇頓落十二齒

續鍾嶸句眼

綠牝鞍

處士富麟翁從縣令芮通源游蘭居寺通源給以綠

牝鞍

幽燕記異

鳳眼

龍道千卜室于積玉坊編籐作鳳眼窻支床用薛荔
千年粮炊飯洒沈水香浸酒取山鳳髓

青州雜記

巨粟殼爲盃

鄴中產巨粟脫其殼可以爲盃

鄴群名錄

眉分九聚

朱泚眉分九聚相者告以大貴泚信之

金臺錄

洞天餅

虢國夫人就屋梁上懸鹿腸於半空筵宴則使人從屋上注酒於腸中結其端欲飲則解開注于盃中號洞天聖酒將軍又曰洞天瓶

酒中玄

賜成象殿茶果

金鑾故例翰林當直學士春晚困則日賜成象殿茶

果

金鑾客記

冰雪至夏價等金璧

長安冰雪至夏月價等金璧白少傅詩名動於閭閻每需冰雪論筮取之不復償價日日如是

止戈集

蛙臺

桂林風俗日日食蛙有來中朝為御史者朝士戲之曰汝之居非烏臺乃蛙臺也御史答曰此非蛙名圭虫而已然較圭虫之奉養豈不勝於黑面即哉黑面

卽謂猪也朝士大赧而退承平舊慕

棄官求道

丁繁自尚書卽參靈度禪師棄官修道日食脫粟二升諸僧鉢水一盃夏月夜禪雖飛蚊呌食終不搖動坐夏旣滿面為破爛舊相禪李錄

携琴就松風澗響之間

段由夫携琴就松風澗響之間曰三者皆自然之聲正合類聚羊曇卽以金縷羊要之曲終不去全徽變化篇

出遊必携圍碁短具

王積薪每出遊必携圍碁短具畫紙爲局與碁子并盛竹筒中繫于車轅馬鬣間道上雖遇匹夫亦與對手勝則徵餅餌牛酒取飽而去碁天洞覽

墨難減者萬金不換

凡墨日用之一歲磨減半寸者萬金不換然至難得

成老相墨經

叔茶三等

覺林院志崇叔茶三等待客以驚雷莢自奉以萱草帶

供佛以紫茸香蓋最上以供佛而最下以自奉也客
赴茶者皆以油囊盛餘漉以歸

蠻廐志

笏囊笏架

會昌以來宰相朝則有笏架入禁中逐門傳送至殿
前朝罷則置於架上百寮則各有笏囊親吏持之

常朝錄

徐峰善碁

徐峰善碁段成式欲盡窮其術峰曰子若以墨後貌
與我當使子過我十倍

唐龍髓記

瞬碧侯

琴莊有溶溶軒軒前皆池地也度池得回筇燈上自
在峰藺先生日往峰上採蕨蕨生九股以釀醋異常
守臣取進之封峰曰瞬碧侯

出琴莊美事

錢龍宴

洛陽人有妓樂者三月三日結錢爲龍爲簾作錢龍
宴四圍則撒真珠厚盈數寸以斑螺令妓女酌之仍
各具數得雙者爲吉妓乃作雙珠宴以勞主人又各
令作錫緩帶以一丸錫舒之可長三尺者賞金菱角

不能者罰酒 粧樓記

王武子好馬

王武子好馬非馬不行正旦則柳葉金障泥上元則滿月
羈清明則剪水鞭重午則籠嬌鞍八月中秋則玉
攏揔絡頭重陽則蟬兒鞞春秋社則塗金鞍冬至則
嘶風鞞除日則藥玉鞍每節日則餵馬以明紗豆薺
薇草 馬癖記

鸞手校尉

錢鏐鎮吳越尊賢渴士使名畫工二三十人在松江

號鸞手校尉伺北方士子流移來者咸寫貌以聞擇
清俊福厚者用之胡岳方渡江畫工以貌奏鏐見之
歎曰面有銀光奇士也即時召見 方鎮編年

剪刀麪月兒羹

柳公權以隔風紗作龍城記及八朝名品號錦樣書
以進上方御剪刀麪月兒羹即命分賜 出字錦

玄祿

老子始生其母名之曰玄祿 集真記

大雅之文

柳宗元得韞愈所寄詩先以薔薇露灌手薰玉蕤香
後發讀曰大雅之文正當如是 好事集

二儀餅

開元中長安物價大減兩市賣二儀餅一錢數對胡
批炙十金一拌 豐年錄

槐膠彈子

季少微子女頗多每朝退於亭榭散槐膠彈子數百
枚令諸小兒爭取之以為戲笑終日不倦戲已復收
于篋 放懷集

酒神

酒席之士九吐而不減其量者為酒神 醉錄

九芒珠

王武子以九芒珠穿為紉索編華架用之每月洗以

鯉魚涎 招拾精華

石綠鏡臺

張燕公有石綠鏡臺得自明川道士玄宗聞其有異
取以精炭十車燒之不變乃已 類聚記

自課庵

全子栖每爲文則入自課庵一文必三草及十年之後悟其淺近必盡付於火生平凡三焚文集徵文玉井

淵明拜火

陶淵明日用銅鉢煮粥爲二食具遇發火則再拜曰非有是火何以充腹淵明別傳

筆封九錫

薛稷爲筆封九錫拜墨曹都統黑水郡王兼毛州刺

史龍鬚志

墨封九錫

稷又爲墨封九錫拜松燕督護玄香太守兼亳州諸群平章事是日墨吐異氣結成樓臺狀鄰里來觀食久乃滅纂異記

紙封九錫

稷又爲紙封九錫拜楮國公白州刺史統領萬字軍界道中郎將事畧

硯封九錫

稷又爲硯封九錫拜離石鄉侯使持節即墨軍事長

史兼鐵百尚書

鳳翔退耕傳

爲花樹洗瘡止痛

郭文在山間有石榴楊梅等花爲樵牧所傷殆甚賣
簪酤酒以澆花樹人問之曰爲二子洗瘡止痛

芳賢傳

雲仙雜記卷之六

雲仙雜記卷之七

元白兩不相下

元微之白樂天兩不相下一日同詠李花微之先成
白蒂綃開萬朵樂天乃服綃練也葦白而綃輕

高隱

外書

仙人栢葉書

郭天民巧思橫生能摺書簡反覆如栢葉狀鄉人謂
之仙人栢葉書

安成記

家庖百品

張元厚家庖百品日日不變有蔡機缸二千盛貯皆滿

梁福廬陵記

硯中出白影珠

侯道昌因雨置龜頭硯於簷下承溜以滌之俄而滴破硯硯中出白影珠十顆有患目者煮珠水洗之皆

愈 馮正雲金谿記

陳蕃待客

陳蕃待客拌飯以鹿脯芣羹以牛脯未嘗別為異饌董慎續豫章記

桂人好食蝦蟆

桂人好食蝦蟆仍重乾菌為糝赴食者至以餘俎包歸遺兒女雖污衫不耻 張洞林桂林志

霜露能染紅紫

鵝管山霜可染紫白鹿潭露能染紅為天下冠恨人無知者 常奉真相潭記

蒲桃髻

小兒髮初生為小髻十數其父母為兒女相勝之辭曰蒲桃髻十穗勝五穗 李明之衡山記

方囊盛金錢

富人賈三折夜以方囊盛金錢於腰間微行市中買酒呼秦聲女置宴

方德遠金陵記

千眼仙人赴東林寺

廬山遠法師命畫之日山中峯澗寺落皆見千眼仙人成隊執幡幢香花赴東林寺法師死乃止

十三賢

共注廬山記

洛如花

吳興山中有一樹類竹而有實似莢狀鄉人見之以

問陸澄澄曰名洛如花郡有文士則生

張寔就印錄

虱念阿房宮賦

揚州蘇隱夜臥聞被下有數人齊念阿房宮賦聲繁而小急開被視之無它物唯得虱十餘其大如豆殺之即止

清異志

甲乙膏

蜀人二月好以豉雜黃牛肉爲甲乙膏非尊親厚知不得而預其家小兒三年一享

浣花旅地志

魚脊出金釵

寶曆中西陽人見釣魚師有魚腦貫黃文愛而買歸
食至脊上出金釵一隻長六寸

唐餘錄

團沙捏成睡嵇康

房瑄少時曾至洲渚上團沙捏成睡嵇康甚有標態
見者多愛之

童子通神錄

樂音泉

強村有水方寸許人欲取之唱浪淘沙一曲即得一
盃味甘冷村人因名曰樂音泉

玄山記

石斧斫斫斷詩手

杜甫子宗武以詩示阮兵曹兵曹答以石斧一具隨
使并詩還之宗武曰斧父斤也兵曹使我呈父加斤
削也俄而阮聞之曰誤矣欲子斫斷其手此手若存
天下詩名又在杜家矣

文覽

清水郎君

司馬伯殊買得鴨卵一枚非常珍重夜猶未食夢曰此
卵乃徐龍幼子清水郎君也不殺將富殊乃放之

三峯集

徐鳳儀杖

徐鳳儀有一杖直如筆管其後每年生一節二十年
每年縮一節三月則杖之四面青赤白黑各開一花
不知何木也 陶家餅餘事

劒生神芝則天下晏清

成都朱善存家世寶一劒每生神芝則天下晏清如
安史黃巢之亂劒皆吐黑煙厲天不差毫厘 玉塵集

聚芳圖百卷帶

宗測春遊山谷見竒花異草則係于帶上歸而圖其
形狀名聚芳圖百花帶人多效之 高士春秋

李卷如飛

伍貫卿居沅陵家有李花一株月夜奴婢遙見花作
數團如飛仙狀上天去花上露水倏然作雨數千點

卷則亡矣 樞要錄

起藁窻上

江摠爲文以至吟詠得意則起藁於窻上不堪示則
投置溷中久而文遂工矣 文筆襟喉

蜜浸烏梅解宿醒

陳永陽王宿醒未解則爲蜜浸烏梅每啖不下二十

枚清醒乃已樵人直說

榕粉

小兒瘡痂以榕粉日傳之則易差而無痕出汗漫錄

灰山

無棣有灰山山南有石竅其中二麥無數取之不極三

賢典畧

嗜蛤蜊

吐突承瓘嗜蛤蜊炙以鐵絲床數澆鹿角漿然後食

傳芳畧記

譚衣

穆宗以玄綃白書素紗墨書為衣服賜承幸宮人皆
淫鄙之詞時號譚衣至廣明中猶有存者中諱錄

三樣錢買二色酒

西門季玄造二色酒白酒中有黑花斟為器中卷亦
不散其中有肝石故也崔道旅以金銀銅錢來酤曰
以我三樣錢買君二色酒欲辭得乎常新錄

大筍中有眼睛

裴晉公於籃田得一大筍破之有三四眼睛而香美

過甚乃與曾序分食之 晉公遺語

雨點雷磨紙

治紙之昏而不染墨者用雨點螺磨紙左右三千下其病去矣 文房寶飾

沈休文多病

沈休文多病六月猶綿帽温爐食薑椒飯不爾則委頓 自慶錄

盲郭璞

路巖幼病有人稱善醫禳之術巖用之不效歎曰此

盲郭璞也 搔首集

淨眼僧

傳法寺淨眼僧能用藥煮烏頭施人治百疾皆驗又以穢跡呪治疔破鐵城偈除鬼崇發無不捷 僧園逸錄

竹節中神水

重午日午時有雨則急斫一竿竹竹節中必有神水瀝取和獺肝爲圓治心腹塊聚等病 出金門歲節

釀換骨膠

憲宗采鳳李花釀換骨醪晉公平淮西回黃袍金餅
遠賜二斗叙間錄

畏暑藥

李輔國大畏暑藥或人因以示之必眼中火出毛髮
皆瀝血因致大病叩頭錄

分香蓮

三堂使宅有鈎仙池一種蓮子一歲再結實子十隻
其花時香兼挑梅萸菊郡人傳分香蓮不論錢三堂
往事

雪竹搔頭

趙綸妻死遺雪竹搔頭於堦下不數日化為楊梅花
朶如撒時人異之姑臧前後記

遇棊仙

卞子京遇棊仙束帶拜金鑄紫堂仙仍坐於席上勝
克之利萬不失一手參棊訣

焚杜甫詩飲以膏蜜

張籍取杜甫詩一帙焚取灰燼副以膏蜜頗飲之曰
令吾肝腸從此改易詩源指訣

藏盤筵於水底

白氏履道里宅有池水可泛舟樂天每命賓客繞舡以百十油囊懸酒炙沉水中隨舡而行一物盡則左右又進之藏盤筵於水底也窮幽記

七井生涼

霍仙鳴別墅在龍門一室之中開七井皆以雕鏤木盤覆之夏月坐其上七井生涼不知暑氣雲林異景志

雲仙雜記卷之七

雲仙雜記卷之八

八角玉升

宣帝時西夷恒阨國貢八角玉升夏以水澆之則無暑冬以火迫之無寒異事甚衆逢夏記

失去周字知唐必興

則天初稱問方具告天冊文有吏人見大周字上有兩仙童長二三寸執刀剗削斯須視之失去周字人知唐必復興鳳池編

曲江春游

曲江春游之家以脂粉作紅餠竿上成雙挑掛夾雜
畫帶前引車馬 曲江春游錄

毛詩卷染油代燭

倪芳飲後必有狂怪恬然不耻或以毛詩卷染油代
燭醉遊徹曉 醉仙圖記

眉睫間常化佛

清涼僧海豐苦行三十餘年人見其眉睫間常化佛
千百大如黍米往來遊行已不覺也 清涼僧海

好李花致富

終南及廬岳出好李卷兩市貴侯富民以千金買種
終廬有致富者 耕桑偶記

一物如人眼睛

蕭餘上元夜於宣陽里酒盤下得一物如人眼睛其
體類美石光彩射人餘夜遊市肆閑置掌中每行黑
闇衢巷隨身光明三尺毫末可鑒後因而飛去 影燈
記

造笙

初造笙每管中入荻根細沙一豆許遇吹時飛沙於

中激揚聲愈清徹近世樂工未有知者惜夫

辯音集

喬敷嗜魚

喬敷嗜魚而貧日向漁人貸食漁人送魚一斤則以白堊標門記之後日償價年律一終白堊盈門

壠上

書

浮陽筭

九華小民浚池得物狀類竹根旁有一銘曰浮陽筭太古孕舉投醬正三年不盡民不識字使人讀之試以豆一斗造醬投物其中果三年不減

時逢道士青

陽記

瓜甲間皆出雲煙

魏郡開成中大旱徧禱山岳或言西沈陸先生道行精明請之必驗太守以下乃携杏酒青羊以備牲醪告于山中先生受禮訖對太守呼吸數過五指連拂之瓜甲間皆出雲煙之氣惟中指氣象甚盛先生曰郡中雨得足諸縣皆獲入分亦可小稔而已其說不

誣從容錄

石魚

南康有狂人周可大見魚必置數十頭食餘棄于几上人謂隨即臭腐可大以手摩之皆為石魚後年餘友人訪之見其紙裏石魚煨以啖客新香不異常魚
逍遙公南康錄

王母惜黃中李過蟠朶

西王母居龍月城城中產黃中李花開則三影結實則九影花實上皆有黃中二字王母惜之過為蟠朶與紫陽真官博戲則以一二百枚遞分勝負

集真記

重黎盞酌水

宣武判官洪子昇延嵩山鍊師在宅值大雨堦庭彌滿欲上堂戶子昇有憂色鍊師取懷中重黎盞酌水不滿盃而庭砌隨已乾矣

宣武盛事

時元亨鍊真

方山道人時元亨鍊真厭世三十餘年精唾涕淚俱惜之七十髮不白走如奔馬宋先生曰吾以小術令此子三日即死乃於酒中以羊豕腦一拌啖之元亨不覺也飲罷便苦頭痛下痢明便出如剝淨鷄頭肉者二三升許明日元亨果卒

河中記

孫逢年好酒色老不衰

長安孫逢年日一醉無虛席妓妾曳綺羅者二百餘人晚年衰憊齒皆虫齧空虛如樓閣而舊好不衰長安後記

王維居輞川地不容塵

王維居輞川宅宇既廣山林亦遠而性好溫潔地不容浮塵日有十數掃飾者使兩童專掌縛帚而有時不給

洛都要記

磁石益眼

益眼者無如磁石以爲盆枕可老而不昏寧王宮中多用之

豔寧傳

魚喜鹿胎香

揚州太守閻丘惠會僚友于轉沙亭集境內漁戶令曰所得魚多者有金帛之賞有一漁人以肉物作塊散懸於網上取魚倍衆力凡十網得魚三千六百無甚小者衆慙而退太守詢之曰魚喜鹿胎之香適散懸者乃此物也下網召之萬魚畢聚矣

揚州事迹

降魔寺僧以名召魚

東川降魔寺僧吉祥魁悟多力受飯五鉢日夜誦經
九函池中魚知其數以名召之皆出水而使去即沒
蜀普錄

并代人喜嗜麩

并代人喜嗜麩切以吳刀淘以洛酒漆斗貯之擊鼓
集老幼自以多寡取之至飽河東備錄

鶴識字

衛濟川養六鶴日以粥飲啖之三年識字濟川檢書
皆使鶴銜取之無差金城記

洗心糖

茅地經冬燒去枝梗至春取土中餘根白如玉者搗
汁煎之至其可為洗心糖幽燕記異

桃花絲

青齊間有一種桃花盛開時垂絲至二三尺採之練
以松脂遞相纏結織成鞋履寄往都下人皆不辯何
物青州雜記

秘密泉

甘塘社有一水方丈瑩潔春夏不竭旱則禱之應時

雨下然牛馬猪羊飲之肥澤鷄鴨鵝雁飲之必死鄉
民緣可以救旱號秘密泉 鄴郡名錄

怯夜幡

胡陽白壇寺幡刹日中有影月下無影不知何故因
號怯夜幡 金臺記

魚鼈隨世安危

大禹治水功成令江淮河海神曰魚鼈衰盛隨世安
危自此之後年必小減使其價遞增以食晚末之民
應天意也 禹功記

書冊以竹漆爲糊

凡書冊以竹漆爲糊逐葉微攤之不惟可以久存字
畫兼紙不生毛百年如新此宮中法也 白氏金鎖

真脫絲布

人之爲文語意踈慢者真脫絲布文士之病莫大乎
此 鍾嶸句眼

入酒中沐浴使毛髮識味

石裕方明造酒數斛忽解衣入其中恣沐浴而出告
子弟曰吾平生飲酒恨毛髮未識其味今日聊以設

之庶無厚薄 酒中玄

龍口渠

翰林有龍口渠通內苑大雨之後必飄諸花葉經由
而出有百種香色名不可盡春月尤妙 金鑿密記
口中現五色牙齒

孔幾好術藝延接方士多所傳授能口中現五色牙
齒彩色光絢一瞬即改 止戈集

李有九標

蕭瑀陳叔達於龍昌寺看李花相與香雅細淡潔密

宜月夜宜綠髮宜白酒 承平舊纂

斗盆燒乳頭香

曹務光見趙州以斗盆燒乳頭香十斤曰財易得佛
難求 舊相禪李錄

鼠精李

王侍中家堂前有鼠從地出其穴即生李樹花實俱
好此鼠精李也 好事集

猪肝中有識書

白浦民割猪肝肝中有一紙大如手色如新書云煙

蒼蒼明年無糧次年巢寇起州郡多荒

纂異記

酒魔

常元載不飲群僚百種強之辭以鼻聞酒氣已醉其中一人謂可用術治之即取針挑元載鼻尖出一青虫如小蛇曰此酒魔也聞酒即畏之去此何患元載是日已飲一斗五日倍是

玄山記

糠市

洛陽振德坊皆貧民例享糟糠之薄賀知章目爲糠

市

從容錄

品物互徵古事

房璘至人家凡闕四筵摘其品物互徵古事一切

當

河中記

雲仙襟記卷之八

雲仙襟記卷之九

一杯羹三萬錢

李德裕奢侈每食一杯羹其費約錢三萬雜珠玉寶
貝雄黃硃砂煎汁爲之過三煎即弃其滓

博異志

縑繫南山樹

明皇問富人王元寶家財多少對曰請以一縑繫陞
下南山樹南山樹盡臣縑未窮

博異志

心織筆耕

翰林盛事云王勃所至請託爲文金帛豐積人謂心

織筆耕 北里志

燕奴

有術士於腕間出彈子二丸皆五色叱令變化即化
雙燕飛騰名燕奴又令變即化二小劍交擊須臾復
為丸入腕中 洞微志

三斗爛腸

殷洪遠云周旦腹中有三斗爛腸 金樓子

金菜玉蔬

始皇遣徐福入海求金菜玉蔬并一寸椹

無腸公子

蟹曰無腸公子龜曰先知君

駭雞犀

通天犀中有白紋如絲者置米其上以飼雞雞見驚
走名駭雞犀刻為魚形持入水水輒開 出抱朴子

天鼓

雷曰天鼓雷神曰雷公 抱朴子

虎狼稱呼五君

山中寅曰稱虞吏者虎也稱當路君者狼也稱東王

父者麋也西王母者鹿也成陽公者狐也社君者鼠也抱朴子

鵲巢獺穴

鵲巢知風之所起獺穴知水之高下暉日知晏鳩鳥也陰諧知雨雌也出淮南子

靈運鬚

謝靈運美鬚臨刑施南海祇洹寺爲維摩詰鬚寺中寶惜中宗時安樂公主五日闔百草遣人取之仍剪棄其餘因史纂異

沒了期

錢鏐封吳越王工役大興士卒嗟怨或夜書府門曰沒了期沒了期修城纔了又開池鏐出見之命吏書曰沒了期沒了期春衣纔了又冬衣嗟怨頓息五代史補

拔釘錢

趙在禮在宋州所爲不法百姓苦之一日制下移鎮永興百姓相賀曰眼中拔却釘矣可不快哉在禮聞之上表乞還鎮朝廷許之在禮每口率錢一千號拔

釘錢遂獲百萬 同上

釜中龍

南塘時有蒼頭持龍水圖來貨或得之將練爲衣忽釜中雲蒸起二龍騰躍穿壁而去

黃紙寫勅

正觀中太宗詔用麻紙寫勅詔高宗以白紙多虫蛀尚書省頒下州縣並用黃紙

食玉炊桂

蘇秦之楚三日乃得見王辭行王曰魯不少留對曰

楚國食貴於玉薪貴於桂謁者難得見如鬼王難得見如天帝臣食玉炊桂因鬼見帝王曰聞命矣 戰國策

鷓蚌

趙旦伐燕蘇代爲燕謂惠王曰臣過易水蚌方出曝而鷓啄其肉蚌合而拊其喙鷓曰今日不雨明日不雨即有死蚌蚌曰今日不出明日不出必有死鷓兩不相舍漁者得而并之 同上

鰥婦

魯人有獨處室者隣之鰥婦 寡婦也 亦獨處夜暴風

兩鰲婦室壞趨而託焉魯人閉戶曰男女不六十不
閑居今子幼吾亦幼是以不敢納婦曰何不學柳下
惠然嫗不逮門之女魯人曰下惠則可吾固不可吾
將以吾之不可學下惠之可孔子家吾

螳螂搏輪

齊莊公出獵有螳螂舉足將搏其輪御曰此蟲知進
而不知退不量力而輕就敵莊公曰以爲人必爲天
下勇士矣於是迴車而避之而勇士歸之同上

銅鶴樽

韓王元喜有一銅鶴樽背上注酒則一足倚蒲則正

不滿則傾側

朝野僉載

鵲尾杓

陳思王有鵲尾杓柄長而直置之酒樽凡王欲勸飲
者呼人則尾指其人同上

麒麟楨

唐揚炯每呼朝士爲麒麟楨或問之曰令假弄麒麟
者必修飾其形覆之驢上宛然異物及去其皮還是
驢耳無德而朱紫何以異是同上

喙長三尺手重五斤

陸餘慶爲洛州長史善論事而繆於決判時嘲之曰
說事卽喙長三尺判事則重手五斤同上

鶴鳴鷄樹

鳳閣侍郎杜景儉文章知識並高遠時號鶴鳴鷄橫
朝野僉載

鳩集鳳池

王及善才行庸猥爲內史號鳩集鳳池出朝野僉載

金剛舞夜叉歌

隋諸葛昂高瓚爭爲豪侈昂屈瓚串長八赤餅闊丈
餘餽龐如柱酒行自作金剛舞以送之瓚復屈昂以
車行酒馬行肉碓斬膾碾蒜壘自唱夜叉歌以送之
朝野僉載

金祀玉階

明光殿金玉珠璣爲簾箔金祀玉階晝夜光明在桂

宮中三輔黃圖

傳座

長安風俗元日以後迺飲食相邀號傳座南郭新書

寶苗

山中有葱下必有銀有薤下必有金有薑下必有銅
錫山中有王者木旁枝下垂謂之寶苗

築糠三尺

新羅人泛海漂墮鬼國鬼執之曰汝能與我築糠三
尺乎汝欲鼻長一丈乎其人請築久不成乃為鬼拔
其鼻如象酉陽雜俎

翻綽入水

玄宗嘗令左右提翻綽入池水中復出曰向見屈原

笑臣尔遭逢聖明何亦至此同上

龍巢翻

夷陵江或浮大木蔽塞水面土人謂之龍巢翻北夢

瑣言

見李思戒

明宗不豫馮道入問因指果實曰如食棗不康它日

見李思戒北夢瑣言

一步一計

李克用入魏博覘之城上有旗幟來往晉王曰劉鄩

一步一計更令審探果縛蜀爲人縛旗於上以驢負之循城而行鄴軍遁已二日矣同上

通神錢

張延賞判度支有獄頗寃濫公召吏嚴戒旬日須了明日按上有小帖子曰錢三萬貫乞不問此獄公怒更促之明日帖子云五萬貫公亦怒明日復見帖子曰錢十萬貫遂止不問所親問公曰錢至十萬通神矣無不可回之事吾懼及禍不得不止也幽閑鼓吹

九花虬

代宗時范陽貢馬額高九寸真虬龍也身被五花紋號九花虬後以賜郭子儀杜陽新編

上清珠

開元初蜀賓國王貢上清珠光照一室有仙人玉女雲鶴搖動其中有水旱兵革之災虔視無不應驗同上

副急淚

宋世祖謂劉德願曰卿哭貴妃悲者當厚賞德願應聲慟哭撫膺擗踊涕泗交流上甚悅故用豫州刺史

以賞之上又令醫術人羊志哭貴妃志亦嗚咽極悲
它日有問志者曰卿那得此副急淚志曰我爾日自
哭亡妾耳通鑑

五花館

荆南舊有五花館待賓之上地也故眩上成汭詩曰
不是上台憐姓字五花賓館敢從容南郭新書

烏龍

會稽人張然滯役經年不歸婦與奴私通然養一狗
名曰烏龍後然歸奴懼事覺欲謀殺然狗注精視奴

奴方與手烏龍湯盪奴奴失刀仗然取刀殺奴續搜神

記

鬚髯如戟

山陰公主淫恣悅褚彥回以白帝帝召彥回西上閣
宿十日公主夜就之備見逼迫彥回整身而立從夕
至曉畧不移志公主謂曰君鬚髯如戟何無丈夫意
彥回曰雖不敏何敢首為亂階通鑑

田舍翁十斛麥

李勣入見上問之曰朕欲立武昭儀為后褚遂良固

執以爲不可遂良旣顧命大臣事當且已乎對曰此
陛下家事何必更問外人上意遂決許敬宗宣言於
朝曰田舍翁多收十斛麥尚欲易婦况天子立后何
豫諸人事而妄生議乎同上

赤鳳皇

后所通宮奴燕赤鳳者雄捷能超樓閣兼通昭儀十
月五日宮中故事上靈女朝吹塤擊鼓連臂踏歌赤
鳳皇來曲后曰赤鳳皇爲誰來昭儀曰赤鳳爲姊來
寧爲它人乎后怒以杯擲昭儀裙曰鼠子能噬人乎

昭儀曰穿其裙見其私足矣安在噬人乎帝微聞其
事以問昭儀昭儀曰以漢家火德故以帝爲赤鳳帝
信之大悅趙后外傳

雲仙襟記卷之九

雲仙雜記卷之十

蕤賓鐵

樂工廉郊師於曹綱綱曰教授人多矣未有此性靈
弟子也郊常池上彈蕤賓調忽聞芰荷間有物跳躍
出岸乃方響一片有知者識是蕤賓鐵也指撥精妙
致律呂相應物類相感耳

琵琶錄

截鞞留鞭

姚崇牧荊州受代日闔境民泣撫馬首截鞞留鞭以
表瞻戀

開元天寶遺事

蜂蝶慕香

都下名妓楚蓮者國香無及每出則蜂蝶相隨慕其香同上

自暖杯

內庫有青酒杯紋如亂絲其薄如紙以酒注之温温然有氣相次如沸湯名自暖杯同上

遊仙枕

龜茲國進一枕色如瑪瑙枕之則十洲三島四海五湖盡入夢中帝名爲遊仙枕同上

辟寒犀

交趾國進犀一株以金盤致於殿中暖氣襲人使者曰此辟寒犀也同上

喚鐵

太白山居士郭休有運氣絕粒之術以繩擊一鐵片子鳥獸聞之即集庭下名曰喚鐵開元天寶遺事

氷山

進士張彖力學有大名揚國忠用事爭詣門彖獨不往曰爾輩謂揚公之勢可倚如太山耶以吾所見乃

冰山也皎日一照則當悞人後登第爲華陰尉歎曰
丈夫有凌雲蓋世之志拘於下位若立身於矮屋中
使人擡頭不得遂拂衣長往 同上

卷裊

學士許慎與親友宴花園中聚花鋪座曰吾自有花
裊何消坐具 同上

風流藪澤

長安平康坊妓女所居新進士以紅牋名紙遊其中
時謂此坊爲風流藪澤 同上

筆頭生花

李太白少夢筆頭生花後天才膽逸名聞天下

百寶欄

上賜國忠木芍藥國忠以百寶爲欄 開元遺事

吸卷露

貴妃每宿酒初消多苦肺熱凌晨傍花枝口吸花露

潤肺

同上

含玉燕津

貴妃素有肉體苦熱肺渴每日含一玉魚藉其涼津

沃肺 同上

夜明枕

魏國夫人有夜明枕光照一室不假燈燭 同上

粲花

李白與人談論皆成句讀如春葩麗藻粲於齒牙時
號李白粲花之論 同上

二鶻擲卵

嘉陵江上見二鶻擲卵相上下以接之蓋習其飛也
其胎教之意乎又翅羽未成躍出巢穴往往隨崖而

死其天性俊勇是亦躁進之類

山鷄自愛

山鷄自愛其色終日映水目眩則溺死

天心月脇

皇甫湜稱愈文曰穿天心出月脇

茗戰

建人謂鬪茶為茗戰

金鹿銀麕

天子北征曹奴之人觴天子于泮水之上賜金鹿銀

膚今有地上得銀純金狗之類皆古賂夷狄奇貨程
天子傳

溫柔鄉

成帝謂合德為溫柔鄉曰吾老是鄉矣不能効武帝
求白雲鄉也樊嫫賀曰陛下真得仙者合德號為媿
好趙后外傳

六甲行厨

左慈明六甲能役鬼神坐致行厨

葛洪傳

老子僕徐甲

老子西度関関令尹喜知其非常人從之問道老子
大驚舌聃然故號老聃老子耳有三漏手握十文其
僕徐甲約日直百錢自隨二百年計欠七百二十萬
錢甲詣関令索所欠令問老子對曰甲久應死吾以
太玄清生符救之得至今日使甲張口向地符出丹
書文字如新甲立成一聚枯骨令知老子神異叩頭
請命復以符投骨上甲乃復生

龍牀

歸志和有道術憲宗時獻一龍牀坐則鱗鬣爪角皆

動又於御前以蠅虎子數十令分隊舞梁州曲皆中
音節沈玠傳

九色鳳雛

東方朔游房林之野獲九色鳳雛

懷夢草

鐘火山有香草武帝思李夫人東方朔獻帝懷之即

夢見名懷夢草洞冥記

青鸛

羽山之北有鳥曰青鸛声如鐘磬世語曰青鸛鳴時

太平拾遺記

寶井

范蠡收四方難得之貨或藏之井塹謂之寶井麗色

溢於閨房謂之游宮拾遺記

瓊厨金穴

光武皇后第郭况家工冶之聲不絕人謂之郭氏之
室不雨而雷東京謂况家爲瓊厨金穴

流香渠

靈帝起裸游館千間渠水遶砌蓮大如蓋長一丈其

葉夜舒畫卷名夜舒荷宮人靚粧解上衣著內服或
共裸浴西域貢茵墀香蕒湯餘汁入渠號流香渠

書倉

曹曾積石爲倉以藏書名曹氏書倉

如願

有商人過清湖見清湖君君問所須商曰但乞如願
君許之果得一婢如願即其名也商有所求悉能致
之後因正旦如願晚起商人撻之走入糞壤中不見
令人正旦以繩繫綿人投糞掃中云乞如願

金壘玉膾

吳都獻松江鱸魚場帝曰所謂金壘玉膾東南佳味
也南部煙花記

閃電窓

帝觀書處窓戶玲瓏相望金鋪玉觀輝映溢目號爲
閃電窓南部煙花記

雲仙雜記卷之十

